

Scolas medias da qualidad e renconuschidas

Parlament ha approvà la lescha revedida

■ (anr/fa) Il chantun Grischun ha ina nova lescha davart las scolas medias grischunas. Suentar passa sis uras discussiun detagliada l'ha il parlament acceptà senza cuntravusch ed abstenziuns. La regenza po obligar ina scola media da promover il rumantsch u talian. Era la scola chantunala duai survegnir la pussaivladad da porscher ina scola media d'informatica. Quai èn dus dals resultats dal tractament detaglià da la lescha revedida davart las scolas medias grischunas. Cun quel aveva cumenzà il cussegl grond l'emprim di da la sessiun. Quel di aveva l'acceptà la pussaivladad da manar era scolas medias d'informatica. Ier ha il parlament cuntinuà a tractar la lescha revedida.

Qualidad e dependenza d'avair blers scolars

Tar l'artitgel davart il mantegniment da la qualidad ha *Diego Deplazes* (pcd, Mustér) menziunà il privel che las scolas medias survegnian difficultads sche la recrutaziun da novas scolaras e novs scolars vegnia reglamentada memia fitg. «La libertad d'agir duai restar uschè gronda sco pussaivel.» Cussegliaer guvernativ *Martin Jäger* ha numnà la difficultad da las scolas medias da survegnir uschè blers giuvenils sco pussaivel, mantegnend la qualidad da l'instrucziun: «Per las scolas medias privatas èsi impurtant d'avair scolaras e scolars era d'utro, els duain però esser intellectualmain abels da seguir l'instrucziun.» Questas scolas pon tenor el baingea far agens examens d'admissiun. «Quels duain però esser pretensius e garantir uschia la qualidad, a la fin frequenta dapli che la mesadad dals gimnasiasts grischuns scolas medias privatas.» *Jürg Kappeler* (pvl, Cuira) ha dumandà sch'i saja pussaivel en Grischun da cumprar ina matura. Il chantun insistia che la prestaziun correspundia a las pretensiuns per far la matura, ha ditg Jäger, «pussai-



Christian Kasper, il president da la cumissiun predeliberanta, ha explitgà las differentas propostas tar singuls artitgels da la lescha revedida totalmain.

FOTO Y. BÜRKL

vel èsi ch'ils giuvenils survegnian, savens per in tschert import, ina segunda schanza, ma era qua ston ils maturands manar la prestaziun necessaria.»

«Duair da promover tut las linguas chantunalas»

En l'artitgel 11 da la lescha revedida èsi fixà che la regenza possia obligar las scolas medias da promover spezialmain las linguas rumantsch e talian. *Duosch Fadri Felix* (pld, Suot Tasna) ha dumandà tge che quai signifitgia. «Noss duair è da pussibilitar per tut las trais linguas chantunalas

ina purschida d'instrucziun adequata», ha respus cussegliaer guvernativ Jäger, «er sche nus savain ch'igl è difficil da chattar persunas d'instrucziun qualifitgadas per quest'instrucziun.» El ha menziunà la critica ch'igl ha dà causa che la regenza ha permissa a l'Institut Otalpin a Ftan (IOF) da porscher ina matura bilingua tudestg-englaisa e betg resguardar er il rumantsch. «Quai è ina decisiun per internazionalisar la purschida da l'IOF», ha ditg Felix ch'è cussegliaer administrativ da l'IOF, «rumantsch vegn purschì vinavant a la scola media a Ftan sco rom facultativ.» En con-

nex cun la renconuschientscha da las maturas e diploms da las scolas medias grischunas ha il deputà Felix dumandà sche quai saja garanti en tut la Svizra. Quai saja, sco che Jäger ha ditg, il cas. Areguard la dumonda, scola media d'informatica era a la scola chantunala a Cuira u betg, ha decis il parlament cun 59 cunter 61 vuschs che quai duaja esser il cas. Suentar ina debatta extendida è stada la decisiun finala clera ed unanima: Cun 117 vuschs ha acceptà il cussegl grond la lescha revedida totalmain davart las scolas medias dal Grischun.

La lescha revedida da las scolas medias rinforza il rumantsch

(lr) Il cussegl grond ha tractà il sboz per la revisiun totala da la lescha davart las scolas medias en il chantun Grischun ed ha approvà quel senza cuntravuschs. La Lia Rumantscha prenda cun plaschair enconuschientscha da la decisiun dad acceptar tranter auter duas novas disposiziuns che rinforzan la furmaziun en rumantsch.

La Lia Rumantscha è satisfatga ch'il cussegl grond è pront dad agiuntar a la lescha davart las scolas medias tenor la proposta da la regenza duas disposiziuns che rinforzan l'instrucziun en rumantsch. La regenza po da nov obligar las scolas medias da promover spezialmain il rumantsch u il talian (art. 11 al. 2). Ultra da quai è ussa fixà che scolas medias ston tegnair quint da las scolaziuns bilinguas en las linguas chantunalas (art. 4 al. 2).

La decisiun per la revisiun totala da la lescha davart las scolas medias contribuescha decisivamain a la promozion dal rumantsch sin il stgalim secundar II. La lescha è er ina pitga impurtanta per cumbatter la mancanza actuala da magistras e magistras da rumantsch.

Lentschatta da l'onn aveva la Lia Rumantscha prendì posiziun davart il sboz da consultaziun per la lescha davart las scolas medias. Ella ha plaschair che sias dumondas èn vegnidas resguardadas en la nova lescha revedida.